



6. december 2013

Inatsisartut Suleriaasianni § 37 naapertorlugu Naalakkersuisunut apeqquut imaattoq matumuuna saqqummiuppara:

**Siunissami sanaartornerit Issittumi silap pissusaanut atatillugu unammisassanut ullumikkornit annertunerusumik naleqqussaanissaq siunertaralugu qulakkeerinissaq, taamatullu sanaartornerlunnerit uparuartarneqarnissaat pinngitsoortinneqarnissaallu siunertaralugit nakkutilliinerup annertusinissaa pillugit sanaartornermut inatsisit allanngortinnissaannut tigussaasunik pilersaaruteqarpa?**

**Taamaassimappat: Allannguutit qaqugu atuutilersinnaanerit ilimagineqarsinnaava?**

(Inatsisartuni ilaasortaq Naaja H. Nathanielsen, Inuit Ataqatigiit)

### **Tungavilersuut**

Sanaartornernut atatillugu sanaartornerlunnerit Issittumilu pissutsinik ataqqinninnginneq ilisimasakinnerlu pillugit tusartakkat qaqutiguunngitsumik tusallattaarpavut. Taamaammat Issittumi silap pissusaata naammattumik eqqarsaatigineqartannginnera, sanaartornerillu nalaanni nakkutilliinerit naammaginantanninneri eqqarsaatigalugit maleruagassat atuuttut naammattumik pinaveersaartitsinnginnerat malunnaateqarpoq.

Nunatsinni silap pissusaanut naleqqussaanissaq siunertaralugu sanaartornermut inatsisit sanaartornernilu najoqqutassiat nutarterneqartariaqarneri pisariaqarluinnartutut isumaqarfigaara. Tamassuma saniatigut sanaartornerlunnerit akiorniarlugit nakkutilliilluarnerunissap qulakkeerneqarnissaa pisariaqarpoq.

Sanaartortitsisunut, sanaartornermut atatillugu ingerlatsitseqatigiiffinnut, kommunitut Namminersorlutillu Oqartussanut piumasaaqatit annertusarlugit nutaanik maleruagassiorsinnaaneq aamma periarfissaavoq. Siunissarli ungasinnerusoq qiviarlugu illunik inissianillu pitsaanerusunik sanaartortoqarsinnaalissappat naggataatigut aningaasanik sipaarfiusussaassaaq.

Apeqqutigineqartut ullut suliffiusut qulit qaangiutsinnagit akineqarnissaat kissaatigissavara.